

CONVENIO DE COLABORACIÓN ENTRE A CONSELLERÍA DE SANIDADE, O SERVIZO GALEGO DE SAÚDE, A AXENCIA GALEGA PARA A XESTIÓN DO COÑECEMENTO EN SAÚDE E TECNOLOXÍAS PLEXUS SL, INSATI INNOVATION SL, E INFORHOUSE SL, PARA A PARTICIPACIÓN NO LIVING LAB DE SAÚDE DE OURENSE DA REDE DE LIVING LABS DE SAÚDE DE GALICIA (LABSAÚDE)

Ourense, a 9 de novembro de 2021

COMPARECEN

Dunha parte, don Julio García Comesaña, Conselleiro de Sanidade da Xunta de Galicia e Presidente do Servizo Galego de Saúde e da Axencia Galega para a Xestión do Coñecemento en Saúde (ACIS), nomeado por Decreto 112/2020, do 6 de setembro, de acordo co establecido no artigo 34 da Lei 1/1983, do 22 de febreiro, normas reguladoras da Xunta e da súa Presidencia, e de conformidade cos Decretos 136/2019 e 137/2019, polos que se establece a estrutura orgánica da Consellería de Sanidade e do Servizo Galego de Saúde, respectivamente; e co Decreto 112/2015, do 31 de xullo, polo que se crea a Axencia Galega para a Xestión do Coñecemento en Saúde e se aproban os seus estatutos; e co establecido na Lei 1/2016, do 18 de xaneiro, de transparencia e bo goberno, así como na normativa vixente en materia de procedemento administrativo común das Administracións públicas e do réxime xurídico do sector público.

E de outra parte, don Leoncio Touceda Taboada, con DNI nº 44809418J, en nome e representación de Tecnoloxías Plexus, SL, que actúa como representante do equipo aos efectos de comunicacións, con CIF nº B15726177, e sede en rúa José Villar Grajel, 22-24, Polígono de Boisaca-15890 Santiago de Compostela (A Coruña), actuando en calidade de Administrador con poderes que non lle foron derogados nin modificados, de conformidade e no exercicio das

funcións que ten atribuídas en virtude da escritura outorgada ante o notario de Santiago de Compostela, don Enrique Roger Amat con data de 23 de novembro de 2000.

E de outra parte, don Xurxo Cegarra González, con DNI nº 36151481N, en nome e representación de Insati Innovation, SL, con CIF nº B27783216, e sede en Luis Taboada 17, 5B, 36201 Vigo (Pontevedra), actuando en calidade de Administrador que non lle foron derogados nin modificados, de conformidade e no exercicio das funcións que ten atribuídas en virtude da escritura outorgada ante o notario de Vigo D. Francisco Fernández Íñigo o 14 de febreiro de 2013.

E de outra parte, don Vidal Díaz Cotón, con DNI nº 33278954R, en nome e representación de Inforhouse, SL, con CIF nº B36112803, e sede en Ciudad del Transporte 61-69, Polígono Industrial do Tambre, 15890 Santiago de Compostela (A Coruña), actuando en calidade de Administrador con poderes que non lle foron derogados nin modificados, de conformidade e no exercicio das funcións que ten atribuídas en virtude da escritura outorgada ante o notario D. José Cortizo Nieto con data de 13 de febreiro de 2013.

Os representantes, recoñecéndose mutuamente capacidade xurídica suficiente, subscriben en nome das súas respectivas entidades o presente convenio e, para o efecto

EXPOÑEN

Primeiro.- A Consellería de Sanidade é o órgano da Administración autonómica responsable da superior dirección e control da execución da política da Xunta de Galicia en materia de saúde, planificación e asistencia sanitaria e farmacéutica, así como o exercicio das competencias da Xunta de Galicia para asegurar á cidadanía o dereito á protección da saúde.

Así mesmo, a Lei 1/1989, do 2 de xaneiro, creou o Servizo Galego de Saúde como un organismo autónomo de carácter administrativo, dotado de personalidade xurídica propia, que ten como finalidade a xestión dos servizos sanitarios de carácter público dependentes da Comunidade Autónoma de Galicia e a coordinación integral de todos os recursos sanitarios e asistenciais.

O obxectivo do Servizo Galego de Saúde é a provisión dos servizos e das prestacións de atención sanitaria individual de cobertura pública no ámbito da Comunidade Autónoma, dentro do marco básico de financiamento do Sistema público de saúde de Galicia, garantindo os dereitos recoñecidos aos cidadáns.

O Servizo Galego de Saúde exerce o goberno, a dirección e a xestión dos centros, servizos e establecementos sanitarios propios ou adscritos, garantindo a provisión dos servizos e prestacións de asistencia sanitaria de cobertura pública; coordina a xestión dos recursos humanos, materiais e financeiros que teña asignados, e exercerá aquelas funcións que lle delegue ou encomende a Consellería de Sanidade.

Segundo.- A Axencia Galega para a Xestión do Coñecemento en Saúde créase polo Decreto 112/2015, do 31 de xullo, polo que se crea e se aproban os seus estatutos, e de conformidade coa autorización prevista nos artigos 40 e 41 da Lei 14/2013, do 26 de decembro, de racionalización do sector público autonómico.

Entre os obxectivos da ACIS está elaborar a planificación en materia de docencia, formación, investigación, innovación e avaliación de tecnoloxías e servizos sanitarios, en función dos criterios e obxectivos de planificación estratéxica definidos polo Servizo Galego de Saúde e pola Consellería de Sanidade, e de xestionar o coñecemento no sistema público de Saúde de Galicia.

De acordo co artigo 9 do citado decreto correspóndelle á Axencia, entre outras competencias, as funcións de:

- Planificar, promover, e avaliar a formación continuada do persoal do Sistema público de

saúde de Galicia, así como programar, executar e avaliar os programas de docencia e formación non regulada conforme a estratexia definida pola Consellería de Sanidade e o Servizo Galego de Saúde.

- Planificar, promover, coordinar, executar e avaliar a investigación e innovación sanitaria de calidade en función dos criterios e obxectivos definidos polo Servizo Galego de Saúde e a Consellería de Sanidade, e de acordo coa política xeral da Xunta de Galicia en materia de I+D+i.
- Coordinar, realizar o seguimento e avaliación dos institutos de investigación sanitaria, o impulso de estruturas de investigación en rede entre eles, así como a implantación e xestión dun sistema de avaliación da capacidade investigadora.
- Exercer as funcións de coordinación que corresponden á Consellería competente en materia de sanidade en relación cos institutos de investigación sanitaria, e realizar o seguimento e a avaliación destes e das fundacións de investigación sanitaria vinculadas ao Servizo Galego de Saúde.

Terceiro.- Que TECNOLOGÍAS PLEXUS, SL (en adiante a ENTIDADE) é unha empresa TIC que, desde a súa constitución no ano 2000, foi adaptándose ás diferentes necesidades e demandas do mercado incorporando, na actualidade, unha oferta diferenciada e especializada de novas solucións tecnolóxicas. Conta cunha dilatada experiencia na investigación e o desenvolvemento de solucións tecnolóxicas aplicadas a diversos sectores. A realización destes proxectos é posible grazas a contar con persoal altamente cualificado e dedicado a actividades de carácter innovador na empresa. O departamento de I+D+i da compañía, ademais de contar co equipamento necesario para levar a cabo tarefas desta índole, dispón de persoal cunha traxectoria académica e profesional especialmente orientada cara á actividade investigadora, o que os fai idóneos para desempeñar estes labores no seo da empresa de maneira eficiente. Así, PLEXUS conta cunha ampla experiencia no desenvolvemento de proxectos de investigación a nivel nacional e tamén internacional, tanto no papel de líder como de socio, o que lle permitiu

ampliar o seu know-how e dispor dunha metodoloxía de traballo idónea para innovación aberta e a colaboración entre empresas, organismos de investigación e entidades e usuarios finais, o que resulta de especial interese para a finalidade do presente proxecto.

Cuarto.- De conformidade ao artigo 131.2 da Lei 8/2008, do 10 de xullo, de saúde de Galicia, a Administración sanitaria promoverá un modelo de innovación aberta orientado a impulsar a creatividade, a cooperación e a aplicación no sistema sanitario dos cambios que acheguen valor a pacientes e profesionais.

De acordo co disposto no artigo 34.1. da Lei 14/2011, do 1 de xuño, da Ciencia, a Tecnoloxía e a Innovación: *“Os axentes públicos de financiamento ou execución do Sistema Español de Ciencia, Tecnoloxía e Innovación, incluídas as Administracións Públicas, as universidades públicas, os organismos públicos de investigación da Administración Xeral do Estado, os consorcios e fundacións participadas polas administracións públicas, os organismos de investigación doutras administracións públicas, e os centros e institucións do Sistema Nacional de Saúde, poderán subscribir convenios suxeitos ao dereito administrativo. Poderán celebrar estes convenios os propios axentes públicos entre si, ou con axentes privados que realicen actividades de investigación científica e técnica, nacionais, supranacionais ou estranxeiros, para a realización conxunta das seguintes actividades:*

- a) *Proxectos e actuacións de investigación científica, desenvolvemento e innovación.*
- b) *Creación ou financiamento de centros, institutos, consorcios ou unidades de investigación, e infraestruturas científicas.*
- c) *Financiamento de proxectos científico-técnicos singulares.*
- d) *Formación de persoal científico e técnico.*
- e) *Divulgación científica e tecnolóxica.*

- f) *Uso compartido de inmuebles, de instalacións e de medios materiais para o desenvolvemento de actividades de investigación científica, desenvolvemento e innovación.*”

Quinto.- Que por Resolución de 3 de marzo de 2020 se pon en marcha a Rede de Living Labs de Saúde de Galicia (denominada LABSAÚDE) e apróbanse e publícanse as bases reguladoras para o procedemento de selección das entidades que participarán no Living Lab de Ourense e procédese á súa convocatoria para o ano 2020.

Con este obxectivo, o Servizo Galego de Saúde pon en marcha a Rede de Living Labs de Saúde de Galicia (LABSAÚDE), comezando a súa andaina a través do Living Lab de Ourense.

LABSAÚDE xorde como mecanismo facilitador para a creación e posta en marcha de proxectos innovadores nunha contorna na que interactúan múltiples axentes, para dar resposta a necesidades reais detectadas no Sistema de Saúde de Galicia.

Pola mesma Resolución, no artigo 6, establécense o proxectos elixibles no Living Lab de Saúde de Ourense, entre os que estarán iniciativas de carácter innovador xa sexa en produto/servizo, en procesos e/ou no modelo de negocio tanto no sector sanitario e biomédico como naqueles que sexan transversais ao sector saúde: alimentación, TIC, novos materiais e construción, electrónica e robótica.

No artigo 16, establécese o procedemento de selección das entidades que serán seleccionadas para a participación no Living Lab de Saúde de Ourense.

No artigo 18 da devandita Resolución, se establece o Convenio de colaboración como o instrumento para regular as obrigacións de cada unha das partes no devandito proceso de innovación aberta.

Sexto.- Por Resolución definitiva de 14 de abril de 2021, de acordo co artigo 17 da devandita Resolución, Tecnologías Plexus, SL. foi seleccionada como participante no Living Lab de Ourense co proxecto *“Asistente virtual para el envejecimiento activo de personas con enfermedades mentales neurodegenerativas – AVECEN”*.

Por todo o exposto, as partes acordan subscribir o presente Convenio de Colaboración, que se reixerá polas seguintes

CLÁUSULAS

Primeira.- Finalidade do acordo

O obxecto deste acordo é o establecemento dun marco de actuación para a colaboración entre as partes en actividades de innovación aberta impulsadas polos usuarios a través do modelo Living Lab.

Ditas actividades de I+D+i levaranse a cabo nas instalacións do Living Lab de Saúde de Ourense, situado no Complexo Hospitalario Universitario de Ourense (CHUO).

Segunda.- Fins e obxectivos do living lab de saúde de Ourense

O obxectivo xeral do Living Lab de Saúde de Ourense é a creación dun ecosistema de innovación no ámbito da saúde, que impulse a cooperación segundo o modelo da cuádrupla hélice (administracións públicas, academia, empresas e usuarios). Nesta liña, os principais obxectivos do Living Lab de Saúde de Ourense son:

- Crear un ecosistema de innovación aberta baseado nun enfoque de co-creación sistemático que integra actividades de innovación no desenvolvemento de produtos e servizos orientados ao sistema sanitario.

- Promover a creación de proxectos innovadores nunha contorna na que actúan múltiples axentes e que sitúa aos usuarios no centro de todo o proceso de innovación para dar resposta a necesidades reais detectadas no Sistema de Saúde de Galicia.
- Dotar ás entidades beneficiarias dun espazo físico a modo de centro demostrador para que, nunha contorna real, poidan testar os prototipos que desenvolvan.

O Living Lab de Saúde de Ourense dispón dunha contorna de hospitalización experimental situado no Complexo Hospitalario Universitario de Ourense (CHUO), con escenarios clínicos de gran desenvolvemento tecnolóxico que permitirán desenvolver neles contornas Living Lab nos que testar dunha forma sistemática a experiencia do usuario. O hospital conta tamén cun espazo para "co-crear" a través da interacción e intercambio de coñecemento.

O persoal dedicado no Living Lab levará a cabo conxuntamente coas entidades seleccionadas diferentes tipos de actividades, conducidas mediante dinámicas de innovación para evolucionar prototipos e produtos innovadores establecendo valoracións obxectivas dos resultados dos proxectos con criterios socio-ergonómicos, socio-cognitivos e socio-económicos para diminuír o risco de fracaso de aceptación do produto no mercado.

Ademais das accións xerais de comunicación e difusión dos proxectos, traballarán na xeración de relacións entre os diferentes axentes e usuarios, promovendo a colaboración sobre as distintas liñas de investigación identificadas, maximizando as sinerxías en beneficio dos resultados esperados.

Terceira.- Contido do proxecto de I+D+i

O proxecto de actuación da ENTIDADE no marco deste convenio consiste na validación dunha plataforma específica para a xestión de pacientes con enfermidades dexenerativas que facilite a integración de servizos intelixentes e asistentes virtuais móbiles, e que permita a realización dun seguimento activo da evolución do paciente e a toma de decisións, por parte de sanitarios e

coidadores, así como a propia autoxestión das enfermidades neurodexenerativas pola poboación afectada. Para isto dispón dun asistente virtual para a monitorización do estado de saúde dos pacientes a través da execución de rutinas clínicas con recomendacións adaptadas ao seu estado e a avaliación do seu comportamento frecuente, permitindo coñecer a súa evolución ao longo do tempo e valorar en que medida se produce un empeoramento do seu estado de saúde. O sistema contribúe tamén a mellorar a adherencia dos pacientes ás rutinas clínicas, ao tratamento prescrito e, en xeral, aos hábitos de vida saudable.

Así mesmo, facilita a valoración do estado e do comportamento dos pacientes por parte dos profesionais da saúde co fin de mellorar a adaptación das rutinas clínicas e o tratamento ao seu estado, contribuíndo así a mellorar a calidade de vida do paciente no que atinxe á súa mobilidade, autonomía e relacións sociais.

A Comisión de seguimento establecida na cláusula décimo quinta, establecerá na súa primeira reunión ordinaria o plan de traballo que incluírá as fases e cronoloxía para o seu desenvolvemento, medios materiais e humanos, e as normas para a correcta coordinación e execución do proxecto.

Cuarta.- Financiamento

O presente convenio de colaboración non suporá unha axuda directa ou indirecta á entidade participante.

Tal e como se recolle na Comunicación da Comisión Europea no punto 28 do Marco comunitario sobre axudas estatais de investigación e desenvolvemento e innovación. (2014/ C 198/01), *“Cando os proxectos de colaboración os realicen conxuntamente empresas e organismos de investigación ou infraestruturas de investigación, a Comisión considera que non se conceden, mercé ás condicións favorables da colaboración, axudas estatais indirectas ás empresas participantes a través de ditas entidades cando se cumpre algunha das seguintes condicións:*

a) *Que as empresas participantes corran cos custos íntegros do proxecto;*

b) Pode darse ampla difusión aos resultados da colaboración que non xeren DPI, e todo DPI resultante das actividades dos organismos de investigación ou as infraestruturas de investigación cédesse integramente das devanditas entidades, ou

c) Todo DPI resultante do proxecto, así como os correspondentes dereitos de acceso, atribúense aos distintos socios da colaboración de forma adecuada e en función das súas tarefas, contribucións e intereses respectivos, ou

d) Os organismos de investigación ou as infraestruturas de investigación reciben unha compensación equivalente ao prezo de mercado dos dereitos de propiedade industrial que resulten das súas actividades e que se asignen ás empresas participantes, ou aos que se asignen dereitos de acceso ás empresas participantes; o importe absoluto do valor de toda contribución, tanto financeira como non financeira, das empresas participantes aos custos das actividades dos organismos de investigación ou as infraestruturas de investigación resultantes dos DPI correspondentes, pode deducirse desa compensación.”

De acordo co anterior, a fin de que o presente convenio de colaboración non poida supoñer unha axuda directa ou indirecta, a entidade participante correrá cos gastos derivados do proxecto que sexan adicionais á normal actividade asistencial no centro sanitario, ou no seu caso, a Comisión de seguimento poderá establecer unha compensación equivalente ao prezo de mercado dos dereitos de propiedade industrial que resulten das actividades realizadas pola administración sanitaria no Living Lab e que se asignen ás empresas participantes.

A propiedade e xestión dos resultados derivados dos proxectos desenvoltos no marco do Living Lab serán sempre da entidade participante.

Quinta.- Persoal

As Partes poderán poñer ao dispor da outra entidade a algúns dos seus profesionais ou técnicos, asumindo a súa remuneración e demais obrigacións civís e sociais a entidade de orixe. Este persoal estará obrigado, neste caso, a cumprir coas normas que rexan no centro ao cal

vaian traballar.

Non obstante, o presente convenio non suporá relación laboral, contractual ou de calquera outro tipo do Servizo Galego de Saúde cos profesionais da ENTIDADE colaboradora, de forma que non se poderá esixir ao Servizo Galego de Saúde responsabilidade directa, indirecta ou subsidiaria algunha polos actos ou feitos acontecidos no seu desenvolvemento.

Corresponderalle á ENTIDADE responsabilizarse da adecuada e debida titulación das persoas que van desempeñar tales funcións, tanto de forma directa como en caso de subcontratación, en aras a evitar o intrusismo profesional e unha máis adecuada e eficaz realización das actividades para xestionar.

Sexta.- Equipamento

Os bens de equipo achegados por calquera das partes no proxecto serán sempre da súa propiedade.

Sétima.- Consentimento informado

O Complexo Hospitalario Universitario de Ourense (Living Lab de Ourense), obrígase a informar debidamente aos pacientes suxeitos á participación no devandito proxecto de I+D+i, debendo asinar a correspondente autorización naqueles casos nos que a normativa aplicable o requira.

Oitava.- Obrigas das partes

No marco do presente acordo a ENTIDADE asume as seguintes obrigacións con carácter enunciativo e non limitativo ás exixidas pola lexislación aplicable:

- a) Aportar a documentación necesaria.
- b) Respetar a confidencialidade da información relativa ao proxecto de I+D+i e garantir o anonimato dos participantes.

- c) Comunicar os acontecementos adversos graves derivados da execución do proxecto de I+D+i.
- d) Dispoñer dun Seguro de Responsabilidade Civil.

No marco do presente proxecto de actuación o CENTRO asume as seguintes obrigacións con carácter enunciativo e non limitativo ás exixidas pola lexislación aplicable:

- a) Velar pola correcta realización do proceso de I+D+i.
- b) Respetar a confidencialidade da información relativa ao proxecto e garantir o anonimato dos suxeitos participantes.
- c) Obter o consentimento informado dos suxeitos antes da súa inclusión no proxecto de I+D+i.
- d) Realizar a supervisión do proxecto de I+D+i, e elaborar os informes preceptivos.

Novena.- Póliza de seguro de responsabilidade civil

No caso de proxectos suxeitos a seguro ou garantía financeira, a ENTIDADE deberá subscribir unha póliza de seguro de responsabilidade civil e acreditar a súa vixencia ante a Comisión de seguimento sempre e en todo caso antes do desenvolvemento dos traballos.

Décima.- Comité de Ética da Investigación con Medicamentos de Galicia (CEIm-G)

No caso de proxectos que pretendan realizar estudos con pacientes, coas súas mostras biolóxicas ou cos seus datos de saúde necesitarán dispoñer da aprobación do Comité de Ética da Investigación con Medicamentos de Galicia (CEIm-G), órgano responsable da avaliación ética, metodolóxica e legal dos estudos de investigación e innovación, así como de calquera outro organismo que resulte exixible de acordo coa normativa sectorial de aplicación.

Undécima.- Propiedade industrial e explotación dos resultados da investigación

A propiedade e xestión dos resultados derivados do proxecto desenvolto no marco das

actuacións asociadas a este acordo será sempre da entidade participante.

Aínda que tal como se dispón na cláusula cuarta do presente convenio para os efectos de garantir que calquera actuación da Administración sanitaria non se considere unha axuda estatal indirecta á entidade, concréntanse en dita cláusula os termos para cumprir con algunha das condicións establecidas no punto 28 do Marco comunitario sobre axudas estatais de investigación e desenvolvemento e innovación (2014/ C 198/01), tendo en conta a tipoloxía, as características de cada proxecto e as actuacións para realizar por parte da administración sanitaria no Living Lab.

Duodécima.- Difusión e publicidade dos resultados

O Living Lab de Saúde de Ourense elaborará anualmente unha memoria resumindo as súas actividades de I+D+i.

Nas publicacións ou en calquera outra forma de difusión dos resultados derivados dos traballos e actuacións realizadas, deberase recoñecer e facer constar a participación de todos os axentes que interviñesen nos traballos, así como a súa pertenza ao organismo ou entidade que a cada un corresponda.

Décimo terceira.- Confidencialidade

Cada unha das partes comprométese a non difundir, baixo ningún aspecto, as informacións científicas ou técnicas pertencentes á outra parte ás que puidese ter acceso no desenvolvemento do presente Convenio, sempre que esas informacións non sexan de dominio público.

Os datos e informes obtidos durante a realización dos proxectos, así como os resultados finais, terán carácter confidencial.

Décimo cuarta.- Datos de carácter persoal

De conformidade co establecido na lexislación vixente, a ENTIDADE, a Consellería de Sanidade, o Servizo Galego de Saúde, e ACIS, aceptan expresamente a incorporación dos seus datos aos ficheiros automatizados corporativos, así como o tratamento automatizado dos mesmos, para as finalidades de xestión do presente Convenio.

Ambas as partes poderán exercer os dereitos de acceso, rectificación, cancelación ou oposición dos seus datos nos ficheiros corporativos da outra parte, nos termos establecidos na lexislación vixente.

Así mesmo, manterán a máis absoluta confidencialidade respecto dos datos de carácter persoal da outra parte aos que tivese acceso pola subscrición do presente convenio, e unicamente poderán cedelos aos organismos oficiais aos que estea legalmente obrigado, de acordo coa lexislación vixente, non podendo facelo con respecto a terceiros privados, todo iso de conformidade co previsto na Lei Orgánica 3/2018, do 5 de decembro, de Protección de Datos Persoais e garantía dos dereitos dixitais e demais normativa de aplicación.

A ENTIDADE deberá tomar as medidas que sexan necesarias para garantir a salvagarda da privacidade, a intimidade e demais Dereitos Fundamentais das persoas destinatarias dos servizos que se presten, especialmente no que se refire ao recolleito na Lei 41/2002, de autonomía do paciente, que establece que toda persoa ten dereito a que se respecte o carácter confidencial dos datos referentes á súa saúde e a que ninguén poida acceder a eles sen previa autorización e na Lei autonómica 3/2001, do 28 de maio, reguladora do consentimento informado e da historia clínica dos pacientes, na que se establece a responsabilidade de custodia de tales datos.

A ENTIDADE deberá asegurar que o titular dos datos que no seu caso se xeren, autorizase adecuadamente a cesión dos mesmos, en concreto os relacionados cos seus datos persoais, o tipo de tratamento e os demais, que sen revelar contido algún sobre a súa enfermidade, datos, información ou historial clínicos, permitan unha adecuada prestación sanitaria. Esta cesión deberá ser comunicada ao delegado de protección de datos.

Pola súa banda, a ENTIDADE comprométese a que o tratamento dos datos persoais solicitados nas actividades do Living Lab, sexan empregados unicamente durante a vixencia deste Convenio e a que non sexan empregados con finalidades diferentes ás que constitúen o obxecto de cesión, quedando excluídos todos aqueles usos estatísticos, comerciais e todos aqueles distintos e alleos ao que motivou a cesión.

Décimo quinta.- Comisión mixta de seguimento

Para garantir a correcta execución e o seguimento do pactado neste convenio constituirase unha Comisión de Seguimento composta de forma paritaria por representantes da ENTIDADE e do o Servizo Galego de Saúde á proposta da Xerencia da Axencia Galega para a Xestión do Coñecemento en Saúde. A Presidencia recaerá no representante do Servizo de Galego de Saúde quen a súa vez terá o voto de calidade de desempate no seu caso.

Esta Comisión reunirse en sesión ordinaria logo da sinatura do Convenio e para determinar e validar a temporalidade dos traballos, medios materiais e humanos e as normas para a coordinación, execución e seguimento do proxecto.

A Comisión fixará as súas propias normas de funcionamento, debendo reunirse con carácter ordinario polo menos unha vez ao ano ou, de forma extraordinaria, cando o solicite xustificadamente calquera das partes. Para estes efectos, serán válidas as reunións por teleconferencia ou videoconferencia.

Á Comisión Mixta correspóndenlle as seguintes funcións:

- a) Realizar o seguimento das accións derivadas do convenio ou dos seus acordos específicos.
- b) Actuar como vehículo de transmisión de todas as informacións e comunicacións que, con carácter global, sexan de interese para as partes.
- c) Resolver as discrepancias e controversias que poidan xurdir na interpretación das

cláusulas do convenio ou dos seus acordos específicos.

- d) Elevar aos órganos competentes das entidades as propostas de mellora, adaptación ou modificación do presente Convenio que se consideren pertinentes.
- e) Calquera outra que se encamiñe ao cumprimento do Convenio ou dos seus acordos específicos, conforme aos intereses das partes.

Décimo sexta.- Entrada en vigor e duración

O presente Convenio de Colaboración entrará en vigor no momento da súa sinatura e a súa vixencia será de UN ANO dende a sinatura do mesmo. Con todo, o convenio pode prorrogarse por mutuo acordo entre as partes con suxeición ao establecido no artigo 34.2. da Lei 14/2011, do 1 de xuño.

Décimo sétima.- Causas de resolución

Son causas de resolución do presente acordo:

- a) O incumprimento total ou parcial das súas cláusulas.
- b) O mutuo acordo entre as partes, que será adoptado cunha antelación mínima dun mes á prevista para a finalización da súa vixencia ou prórroga.
- c) O transcurso do tempo estipulado de duración do mesmo.
- d) Calquera das partes poderá, á súa vez, resolver o presente acordo comunicándoo por escrito á outra parte con seis (6) meses de antelación á data en que vaia a dalo por terminado.

As disposicións das cláusulas duodécima e décimo terceira subsistirán despois da terminación ou rescisión do Convenio de Colaboración.

Décimo oitava.- Natureza xurídica

Este acordo ten natureza de convenio de colaboración, quedando excluído da aplicación da

lexislación dos contratos administrativos, a teor do disposto no artigo 4 da Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014.

Este acordo ten natureza administrativa. As dúbidas que poden xurdir sobre a súa interpretación resolveranse de mutuo acordo entre as partes pola comisión de seguimento. Con todo, no caso de persistencia do desacordo, corresponderá á xurisdición contencioso administrativa resolver as cuestións litixiosas que poidan xurdir da súa interpretación e cumprimento.

Décimo novena. Rexistro de Convenios Transparencia e Bo Goberno

A firma deste convenio de colaboración leva implícito o consentimento expreso das persoas intervinientes para que a Administración pública autonómica galega poda facer públicos os datos de carácter persoal que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo goberno, e a Lei galega 1/2016, do 18 de xaneiro, de transparencia e bo goberno.

O presente convenio será obxecto de inscrición no Rexistro de Convenios da Xunta de Galicia, nos termos previstos no Decreto 126/2006, do 20 de xullo, polo que se regula o Rexistro de Convenios da Xunta de Galicia.

E, en proba de conformidade, ambas as partes asinan o presente convenio, en quintuplicado exemplar, no lugar e data indicados no encabezamento.

**Pola Consellería de Sanidade,
Servizo Galego de Saúde
e ACIS**

Por TECNOLOGÍAS PLEXUS, SL

**Asdo. D. Julio García Comesaña
Conselleiro de Sanidade**

**Asdo. D. Leoncio Touceda Taboada
Administrador**

Por INSATI INNOVATION, SL

Por INFORHOUSE, SL

**Asdo. D. Xurxo Cegarra González
Administrador**

**Asdo. D. Vidal Díaz Cotón
Administrador**